

## KEBILANG

### Ini Sa Keepat Igsulat I Mosis

**Ini Denu Sa Libelu Kebilang**

*Na, Kebilang sa kepengadan siuri igsulat i Mosis enù ka tinulon i Mosis dahini sa kedoo etaw tegelslaél egoh di migbilang kenagda egoh anay. Tinulon di ma dahini sa medoo nebaelan sa medoo tegelslaél taman epat pulù gepalay sa lugay da mig-ipanaw diyà sa melabel tanà mediyù dalesan, edung sa egoh da miglegkà diyà sa Getan Sinay taman sa egoh da migtebow diyà sa kilidan di denu tebowon agdaw sa tanà Kanan. Eg-ipaten i Nemula ma doo kagda apiya di pa endà iseg da egpangunut diyà kenagdi.*

*Na, beken sa langun igsulat i Mosis sa nekesulat diyà sa kagi Menubù.*

**Ini Sa Kagi Sa Medoo**  
**Tegesimbà Amuk Pegenyen Da**  
**Sa Ketabang I Nemula Diyà Sa**  
**Medoo Etaw**  
(Kebilang 6:22–27)

**6** 22Na, mig-ikagi Datù Nemula i diyà si Mosis  
23anì itulù di diyà si Alon owoy sa medoo anak di sa ikagiyen da amuk egssimbà da egpegeeni sa ketabang i Nemula diyà sa medoo tegelslaél. Ini sa ikagiyen da, guwaen da,  
24“Ungayà ké mebegayan i Datù Nemula kiyu sa mepion owoy ipaten di ma kiyu. 25Egssimbà ké ma anì metaes sa tali i Datù Nemula diyà keniyu owoy anì hiduwan di ma kiyu. 26Owoy ungayà ké ma baelan i Datù

Nemula sa mepion diyà keniyu owoy kumelanih ma sa pedu yu.”  
27Agulé guwaen i Datù Nemula, “Amuk ingadanan da sa ngadan ku egoh da egssimbà egpegeeni sa mepion denu sa medoo tegelslaél, begayan ku doo kagda sa mepion.”

**Ini Sa Egoh I Mosis Mighemilì Sa**  
**Pitu Pulù Kaunutan**  
(Kebilang 11:4–6,10–17, 24–30)

**11** 4Na, duen ma medoo etaw beken tegelslaél mig-unut diyà sa medoo tegelslaél egoh da migseesud-esud. Tigtu mesibelek da dé kumaen kaleni, owoy hediya ma sa medoo tegelslaél, egsselen da Mosis i,

guwaen da, "Mepion hedem amuk dumuen sa kaleni mekaen ta. 5Enù ka netulengan ta sa medoo sedà kinaen ta egoh ta dutu Igipu dò owoy endà duen bayad di. Netulengan ta ma sa medoo timun owoy gandulan owoy lansunà owoy bumbay owoy bawang. 6Dodox ini egoh di endà dé iseg ki egbagel. Endà duen kaenen ta liyu daa siini mana egkaenen ta uman agdaw."

10Na, dinineg i Mosis sa keselsel sa medoo etaw egoh da diyà sa selat sa medoo kemalig da. Huenan di, nebukul enù ka tigtu egbulitan i Datù Nemula kagda. 11Mig-ikagi diyà si Datù Nemula, guwaen di, "Maen di ya ebgayyan ko aken kelikutan, aken i egsuguen ko? Ngadan sa binaelan ku sa pesuwan di endà egketuuwan ka diyà kenak? Maen di ya binegayan ko aken sa galebek ku tegeipat siini medoo etaw? 12Beken aken sa mig-anak kenagda owoy beken ma aken sa migpeduen kenagda. Huenan di, maen di ya guwaen ko aken sa eg-ipat kenagda lagà a daa sa tegegaet batà egseleban kenagda anì uwiten ku kagda diyà sa tanà igpasad ko diyà sa tupù da egoh anay? 13Ngadan kenà ku i kumuwa kaleni sa ibegay ku diyà siini medoo etaw? Takà da egsinegaw diyà sa taengan ku owoy guwaen da, 'Begayi ko kami kaleni.'

14Amuk aken daa, endà megaga ku duu umipat siini medoo etaw, enù ka miglowon sa kedoo da diyà sa naken daa egkegaga. 15Amuk éhê ini sa egbaelan ko diyà kenak, imatayi ko dé aken lagbas amuk tuu sa egoh ko egketuuwan diyà kenak, anì endà dé meketigkel a siini dakel kelikutan."

16Agulé inikagiyán i Datù Nemula Mosis i, guwaen di, "Setipon ka sa pitu pulù maama kaunutan diyà sa medoo tegelslaél, sa etaw netiigan ko mepion adat. Uwit ko kagda diyà sa taengan sa Dakel Kemalig kenà yu egsimbà diyà kenak anì tumigdeg da diyà sa dapag ko. 17Tumenà a enù ka mikagi a diyà keniko dahiya. Kuwaen ku sa duma tunung ko sa igbegay sa Suguy ku diyà keniko owoy begayyan ku ma kagda tunung kedu diyà sa Suguy ku anì metabangan da kuna maba sa keipat ko siini medoo etaw anì endà sebaen ko duu egbaba iya wé."

24Agulé mig-angay Mosis i egtulon diyà sa medoo etaw sa tinulon i Datù Nemula diyà kenagdi. Sinetipon di sa pitu pulù kaunutan tegelslaél owoy pinetigdeg di kagda ulingut diyà sa Dakel Kemalig. 25Agulé migtenà Datù Nemula i pineunutan gaeb owoy mig-ikagi diyà si Mosis. Agulé kinuwa di sa duma tunung i Mosis sa igbegay sa Suguy di

diyà kenagdi egoh anay owoy igbegay di diyà sa pitu pulù kaunutan. Hê, egoh da linuhub sa Suguy i Nemula, mig-edung da egtulon sa kagi i Nemula egtebowtebow, dodox endà iseg di nelugay.

26Dodox si Eldad owoy si Medad sa duwa maama diyà sa pitu pulù kaunutan hinemilì i Mosis, migpetangtang da daa diyà sa hagda kemalig, endà mig-angay da diyà sa Dakel Kemalig liyu diyà sa kenà da mig-esud. Dodox linuhub da doo sa Suguy i Nemula, huenan di mig-edung da ma egtulon sa kagi i Nemula egtebowtebow egoh da diyà sa kemalig da.  
 27Agulé duen sa melaud mig-angay egtulon diyà si Mosis, guwaen di, "Egtulon ma Eldad i owoy si Medad sa kagi i Nemula egtebowtebow diyà sa kenà ta mig-esud."

28Agulé mig-ikagi Hosuwa i anak i Nun salu i Mosis owoy kagdi ma sa sebaen sinaligan di. Guwaen di, "O Datù Mosis, hemalangi ko dé kagda."

29Dodox mig-ikagi Mosis i diyà kenagdi, guwaen di, "Enù di ya, egkebukul ka denu kenak? Ungayà ku polo hedem ibegay i Datù Nemula sa Suguy di diyà sa langun etaw di anì tulonen da sa kagi di egtebowtebow." 30Agulé miglikù Mosis i owoy sa medoo kaunutan tegeIslaél diyà sa kenà da mig-esud.

**Ini Sa Egoh I Nemula Migpeuwit  
Sa Medoo Pugù Diyà Kenagda**

(Kebilang 11:31–34)

31Agulé igpeuwit i Datù Nemula diyà sa kelamag sa medoo pugù kedu diyà sa dagat. Miglepal da sakamitelu keen sa kehagtaw da kedu diyà sa tanà owoy migtenà da nekeulingut diyà sa uwang tanà kenà sa medoo tegelslaél mig-esud. Segeagdaw ipanawen kedu diyà sa kenà da mig-esud, iya pelawà sa ilis sa neengkopon da.  
 32Huenan di, neelut agdaw owoy neelut sigep owoy neelut ma sa keduwa di agdaw sa egoh da takà eghagkep sa medoo pugù. Nekeuma epat pulù owoy lima gesakù sa kedoo pugù nekuwa sa uman sebaen etaw. Agulé pinangus da diyà sa kenà da mig-esud. 33Dodox egoh di endà pa neimelut da duu sa kaleni diyà sa ebà da, binulitan i Datù Nemula kagda owoy pinelinadu di kagda temù taman nematay da. 34Huenan di, pinengadan da iya wé kenà Kiblot Hataba enù ka igelebeng da dahiya sa medoo etaw tigtu egkesibelek egkaen kaleni.

**13:1–16** *Na, egoh sa medoo tegelslaél mig-ipanaw diyà sa melabel tanà mediyù dalesan, mig-angay da diyà sa dapag tanà Kanan. Agulé danà sa igsugù i*

*Nemula, hinemili i Mosis sa uman sebaen kaunutan kedu diyà sa sepulù owoy duwa geumpung tugod i Islaél, owoy pineangay di kagda anì kuhien da sa tanà Kanan. Na, si Hosuwa owoy si Kaleb sa duwa ma maama diyà sa sepulù owoy duwa pineangay di egpekuhì diyà sa tanà Kanan.*

**Ini Denu Sa Medoo Mig-angay Egkuhì Sa Tanà Kanan**  
(Kebilang 13:17-33)

**13** <sup>17</sup>Na, egoh sa medoo tegeIslaél buyu dé migtebow diyà sa tanà Kanan, mig-ikagi Mosis i diyà sa medoo kumuhì hinemili di, guwaen di, “Angay yu kuhì sa uwang tanà Kanan. Edung yu diyà sa sugud Negeb, agulé lagbas yu angay diyà sa getan-getan. <sup>18</sup>Hahaa yu temù sa palas iya wé tanà. Hahaa yu ma amuk épê egkegaga sa medoo etaw eg-ugpà dahiya ataw ka endà, owoy hahaa yu amuk medoo da ataw ka endà. <sup>19</sup>Owoy hahaa yu ma amuk mepion sa tanà da ataw ka endà. Owoy hahaa yu ma sa palas sa medoo menuwa da amuk duen kutà da ataw ka endà. <sup>20</sup>Owoy hahaa yu ma palas sa tanà da amuk kebaluyan langun hinemula ataw ka endà, owoy amuk duen

medoo kayu dahiya ataw ka endà. Amuk pelikù yu dini, mepion amuk umuwit yu sa medoo mekaen bunga kedu dutu.” Na, iya sa inikagi di enù ka neuma dé sa sasang di egkelegà sa bunga palas.

<sup>21</sup>Agulé inangay sa medoo maama egkuhì sa tanà Kanan, edung diyà sa melabel tanà pinengadanan da Sin denu kimataan taman sa menuwa Lohob medapag diyà sa benganga tuduk eg-angay diyà sa menuwa Hamat denu belabagan. <sup>22</sup>Na, egoh da mig-ukit diyà sa sugud Negeb, migtebow da diyà sa menuwa Hibelon kenà da mig-ugpà sa umpsing tugod i Ahiman owoy sa umpsing tugod i Sesayi owoy sa umpsing tugod i Talmayi sa medoo tugod i Anak. Na, pitu gepalay sa lugay di nekehuna nemenuwa sa menuwa Hibelon diyà sa menuwa Sowan dutu Igipu dò egoh anay. <sup>23</sup>Agulé egoh da migtebow diyà sa sugud Iskol, miggetas da sa panga palas épê segepungu bunga di tigtu mebegat, huenan di sineoyongon sa duwa geetaw. Migkuwa da ma sa bunga kayu pomegelanti owoy sa bunga kayu pigus. <sup>24</sup>Pinengadanan da iya wé sugud Iskol<sup>a</sup> enù ka iya sa kenà sa medoo tegeIslaél

<sup>a</sup> 13:24 Diyà sa kagi Hibelu, iya sa selepangan kagi Iskol sa segepungu bunga palas.

migkuwa sa segepungu bunga palas.

25Na, egoh di neuma epat pulù agdaw, iya da pelawà eglikù sa medoo migkuhì sa tanà. 26Agulé egoh da migtebow, mig-angay da egtulon diyà si Mosis owoy si Alon owoy sa langun duma da tegeIslaél diyà Kades diyà sa tanà Palan sa melabel tanà mediyù dalesan. Tinulon da diyà kenagda sa langun hinaa da owoy igpehaa da ma diyà kenagda sa medoo bunga hinemulaan inuwit da. 27Mig-ikagi da diyà si Mosis, guwaen da, “Nekeuma ké diyà sa tanà igpekuhì ko diyà kenami. Mepion sa palas iya wé tanà owoy tigtu egkebaluyan langun balangan hinemula. Haa yu, ini sa palas bunga sa hinemulaan diyà iya wé tanà. 28Dodox épê dakel egkegaga sa medoo etaw eg-ugpà dahiya. Tigtu dakel sa medoo menuwa da owoy duen ma sa kutà da. Owoy hinaa ké ma dutu sa medoo dakel etaw tugod i Anak. 29Eg-ugpà sa medoo tegeAmalék diyà sa sugud Negeb denu kimataan. Dodox getan-getan sa kenà da eg-ugpà sa medoo etaw Hétiyo owoy sa medoo etaw Hébusiyo owoy sa medoo etaw Amoliya. Owoy eg-ugpà ma sa medoo tegeKanan medapag diyà sa Dagat Méditeliya owoy diyà sa kilidan lawa't wayeg Holdan.”

30Agulé egpetemeden i Caleb sa medoo etaw egssel diyà si Mosis. Guwaen di, “Mangay ki dé gumila anì tepelen ta sa tanà enù ka mebagel ki doo owoy mekegaga ki ma meka diyà kenagda.”

31Dodox mig-ikagi sa medoo duma di migkuhì, guwaen da, “Endà megaga ta duu gumila sa medoo etaw dutu enù ka uman sa hagda kebagel diyà kenita.” 32Huenan di, medaet sa tinulon da diyà sa medoo tegeIslaél denu sa tanà kinuhì da. Guwaen da, “Dutu siedò tanà, endà egpekeenget sa kedoo bunga hinemulaan diyà sa kedoo etaw di. Owoy tigtu dakel sa langun etaw hinaa ké dutu. 33Hinaa ké ma dutu sa dakel etaw tegeNepilim tugod i Anak. Diyà sa penemdem ké, lagà ké daa kasuk, owoy hediya ma kéen sa kehaa da kenami.”

**Ini Sa Egoh Sa Medoo TegeIslaél  
Migselsel Si Mosis**  
(Kebilang 14:1–10)

**14** 1Na, migkedaet sa pedu sa langun tegeIslaél, huenan di neelut sigep sa kesinegaw da metaled. 2Sinelsel da Mosis i owoy si Alon, guwaen da, “Mepion pa hedem amuk mematay ké dé dutu Igipitu dò ataw ka mematay ké dahini diyà siini melabel tanà mediyù dalesan.

3Maen di ya eg-uwiten i Datù Nemula kita diyà iya wé tanà? Iya daa sa mebaelan ké meimatayan ké danà sa gila owoy mesigkem ma sa medoo sawa ké owoy sa medoo anak ké. Mepion pa hedem amuk pelikù ki dutu Igipu dò.” 4Agulé egseikagiyay da, guwaen da, “Hummelì ki polo sa ulu-ulu ta anì uwiten di kita dutu Igipu dò.”

5Agulé miglagkeb Mosis i owoy si Alon diyà sa taengan sa langun tegeIslaél. 6Owoy si Hosuwa anak i Nun owoy si Kaleb anak i Hipuné, sa duwa maama diyà sa medoo migkuhì sa tanà, kinisì da sa ginis da danà da nebuluk temù. 7Owoy guwaen da diyà sa langun duma da tegeIslaél, “Tigtu mepion iya wé tanà tinelow ké. 8Amuk egketuuwan Datù Nemula i diyà kenita, uwiten di doo kita dutu owoy ibegay di diyà kenita iya wé mepion tanà egkebaluyan sa langun hinemula. 9Huanan di, yoko eg-iniyug ga diyà si Datù Nemula. Owoy yoko ma egkelimedangan duu sa medoo etaw eg-ugpà diyà iya wé tanà. Mekeatu ki doo kenaga enù ka si Datù Nemula sa tumabang kenita owoy inatuwan di dé sa medoo nemula da atung egtunggù diyà kenaga. Huanan di, yoko egkelimedangan na.”

10Dodox egkelukuyan sa medoo etaw polo kagda egbuung batu anì meimatayan

da. Agulé petow dé hinaa sa medoo tegeIslaél sa senang i Datù Nemula egpesoyol diyà sa selatal sa Dakel Kemalig simbaan da.

**Ini Sa Ego I Mosis Migsimbà  
Denu Sa Medoo Etaw**  
(Kebilang 14:11–25)

11Agulé mig-ikagi Datù Nemula i diyà si Mosis, guwaen di, “Nengan sa kesabuh siini medoo etaw sa keeked da kenak? Nengan sa taman sa lugay da endà sumalig diyà kenak apiya di pa igpehaa ku sa medoo panduan diyà kenagda? 12Pelinaduwen ku kagda anì endà dé meetaw ku duu kagda. Dodox pedoowen ku sa tugod ko anì lumowon pa sa kedoo yu diyà kenagda owoy umuman pa sa kebagel yu diyà kenagda.”

13Dodox mig-ikagi Mosis i diyà si Datù Nemula, guwaen di, “Amuk hediya sa egbaelan ko, ngadan sa ikagiyen sa medoo tegelIgipu amuk dinegen da iya wé, enù ka inuwit ko siini medoo etaw kedu Igipu dò danà sa dakel egkegaga ko? 14Ngadan keen sa mebaelan amuk tulonen sa medoo tegeIgipu diyà sa medoo etaw eg-ugpà diyà siini tanà? Nekedineg dé siini medoo etaw kuna si Datù Nemula sa egtabang kenami, kami i etaw ko, owoy hinaa ké ma sa beletukoy kenà ko eg-ugpà

amuk eg-unut-unut ka diyà kenami. Owoy netiigan da ma eg-uwiten ko kami diyà sa keipanaw kéké danà ko eghuna diyà kenami lagà sa beletukoy amuk agdaw owoy éhê palas legleg apuy amuk sigep. 15Na, amuk imatayan ko imet siini medoo etaw ko, iya kéen sa ikagiyen sa medoo etaw migdineg sa lalag ko, 16guwaenda, ‘Inimatayan i Nemula sa medoo etaw di diyà sa melabel tanà mediyù dalesan enù ka endà egkegaga di duu kagda eg-uwit dutu siedò tanà igpasad di ibegay diyà kenagda.’ 17Huenan di, o Datù, egpegeni a diyà keniko anì ipehaa ko diyà kenami sa dakel egkegaga ko owoy anì ipetuu ko sa igpasad ko egoh ko mig-ikagi, 18guwaenda, kuna si Datù Nemula, endà melemu ka mulit owoy endà egkehalì sa dakel kehidu ko owoy kesaligan ka ma. Owoy guwaen ko ma, ipeuloy ko sa salà etaw owoy sa medaet egbaelan da. Dodox sa etaw eg-uman egbael salà, guwaen ko, pigtamayan ko doo kagda owoy sa tugod da taman sa bébé siku da. 19Na, o Datù, danà di endà mehalì sa dakel kehidu ko, egpegeni a diyà keniko anì ipeuloy ko sa salà

siini medoo etaw ko, lagà mendaan sa kepeuloy ko kenagda edung sa egoh da miglegkà dutu Igipu dò taman ini egoh di.”

20Agulé migsagbì Datù Nemula i, guwaen di, “Ipeuloy ku sa salà da danà ko migpegeni. 21Dodox danà ku melalù owoy egpekeseluh sa egkegaga ku diyà siini sinukub langit, igpasad ku 22endà dé duen sebaen etaw mehagtay diyà siini medoo etaw sa mekeawuh diyà iya wé tanà.<sup>b</sup> Hinaa da sa dakel senang ku owoy sa medoo panduan binaelan ku dutu Igipu dò owoy diyà sa melabel tanà mediyù dalesan, dodox sepulù gulè<sup>c</sup> egtepengan da sa ketaes tali ku owoy eg-eked da ma egpangunut diyà kenak. 23Huenan di, endà dé mekekogkog da diyà sa tanà igpasad ku diyà sa medoo tupù da. Endà duen sebaen etaw sa mig-eked kenak mekeuma diyà iya wé tanà. 24Dodox tigesa sa pedu sa egsuguen ku si Caleb, enù ka meeles polo sa hagdi kepangunut diyà kenak. Huenan di, uwiten ku doo diyà sa tanà inangay di egkuhì owoy umépê ma sa medoo tugod di siiya tanà. 25Dodox eg-ugpà pelà sa medoo tegeAmalék owoy sa

<sup>b</sup> 14:22a Netiigan ta diyà 14:29 mematay sa langun tegeIslaél labi duwa pulù gepalay sa kelukes da.

<sup>c</sup> 14:22b Mebaluy mesagkat ma sa selepangan sa sepulù gulè.

medoo tegeKanan diyà sa langun sugud di. Huenan di, simag pelikù yu dema diyà sa melabel tanà mediyù dalesan diyà sa selatal Dagat Akaba.”

**Ini Sa Egoh I Mosis Migpelesut Sa Wayeg Diyà Sa Batu**  
(Kebilang 20:1-13)

**20** <sup>1</sup>Na, egoh di neuma sa muna bulan diyà sa keepat di pulù gepalay edung sa egoh sa medoo tegelslaél miglegkà diyà Igipu, migtebow da dema diyà sa tanà Sin sa melabel tanà mediyù dalesan owoy mig-esud da dema diyà Kades. Dutu sa kenà di nematay Miliyam i tebay i Mosis owoy iglebeng da ma dahiya. <sup>2</sup>Na, endà duen wayeg diyà sa kenà da mig-esud, huenan di nesetipon dema sa medoo etaw diyà sa taengan i Mosis owoy si Alon, <sup>3</sup>owoy sinelsel da, guwaen da, “Mepion hedem amuk nekelapeg ké diyà sa medoo duma ké tegelslaél nematay diyà sa taengan sa Dakel Kemalig egoh i Datù Nemula migpigtamay kenagda. <sup>4</sup>Maen di ya inuwit ko kami diyà siini melabel tanà mediyù dalesan? Iya kéen sa penemdem yu anì mematay ké dahini lapeg sa medoo hinagtay ké ma. <sup>5</sup>Maen di ya pinelegkà ko kami dutu Igipu dò owoy inuwit ko kami diyà siini medaet tanà

endà egkebaluyan di hemulaan sa teligo owoy pigus owoy palas owoy sa medoo liyu egbunga. Owoy endà ma duen sa wayeg inemen ké.”

<sup>6</sup>Agulé sinalidan i Mosis owoy si Alon sa medoo etaw owoy mig-angay da diyà sa bengawan sa Dakel Kemalig simbaan da, owoy miglagkeb da dahiya. Hê, petow dé hinaa da sa senang i Datù Nemula. <sup>7</sup>Mig-ikagi Datù Nemula i diyà si Mosis, guwaen di, <sup>8</sup>“Kuwa ko sa tuked diyà sa taengan sa Baul Tandà Sa Igpasad i Nemula. Owoy setipon yu si Alon sa langun etaw tegeIslaél diyà sa dakel batu daedò é. Ikagi ka diyà sa batu diyà sa taengan sa langun etaw anì dumuen wayeg lumesut. Iya sa baelan ko anì pelesuten ko sa wayeg diyà sa batu anì dumuen sa inemen sa medoo etaw owoy sa hinagtay da ma.”

<sup>9</sup>Agulé inangay i Mosis egkuwa sa tuked enù ka iya sa igsugù i Datù Nemula diyà kenagdi. <sup>10</sup>Agulé sinetipon da i Alon sa langun etaw tegeIslaél diyà sa taengan sa batu. Egoh da nesetipon, mig-ikagi Mosis i, guwaen di, “Taa yu, kiyu i medoo tegetipay uledin. Mekepelesut ké pa atu wayeg diyà siini batu anì mekeinem yu?” <sup>11</sup>Agulé igpeayaw i Mosis sa tuked di owoy duwa gulê binalbal di sa batu. Hê, miglesut dé sa meleges wayeg. Huenan

di, mekeinem sa langun etaw tegeIslaél owoy sa medoo hinagtay da ma.

**12**Dodoo sinigbolow i Datù Nemula Mosis i owoy si Alon, guwaen di, “Danà di kulang sa kepigtuu yu diyà kenak egoh yu endà egpehaa sa kenemulawan ku diyà sa taengan sa medoo tegeIslaél, huanan di beken dé kiyu sa umuwit siini medoo etaw diyà sa tanà igaipasad ku ibegay diyà kenagda.”

**13**Na, pinengadanán da Méliba iya wé wayeg enù ka iya sa kenà sa medoo tegeIslaél migselsel diyà si Datù Nemula owoy sa kenà i Nemula ma migpehaa diyà kenagda sa kenemulawan di.

**Ini Sa Egoh I Alon Nematay**  
(Kebilang 20:22–29)

**22**Agulé miglegkà dema sa langun tegeIslaél diyà Kades owoy mig-angay da diyà sa Getan Hol **23**diyà sa elet sa tanà Idom. Agulé mig-ikagi Datù Nemula i diyà si Mosis owoy si Alon, **24**guwaen di, “Endà mekekogkog Alon i diyà sa tanà ibegay ku diyà sa medoo tegeIslaél. Mematay Alon i enù ka endà migpangunut yu duwa diyà sa igsugù ku keniyu dutu siedò wayeg Méliba. **25**Huanan di, uwit ko Alon i owoy sa anak di si Iliyasal owoy tekedeg yu diyà sa Getan Hol. **26**Amuk tumebow yu dutu, lengà ko sa

kawal i Alon sa tandà di tegesimbà, agulé pekegali ko diyà si Iliyasal sa anak di, enù ka mematay Alon i dutu.”

**27**Agulé pinangunutan i Mosis sa igsugù i Datù Nemula. Hê, hinaa sa langun tegeIslaél sa egoh da migtekedeg diyà sa Getan Hol. **28**Agulé egoh da migtebow diyà sa pulu tuduk, linengà i Mosis sa kawal i Alon owoy igpekegal di diyà si Iliyasal. Hê, neketuu nematay Alon i diyà sa getan. Agulé miglunget Mosis i owoy si Iliyasal kedu diyà sa getan. **29**Na, egoh sa langun tegeIslaél neketig nematay dé Alon i, migkedaet sa pedu da taman telu pulù agdaw.

**Ini Denu Sa Galang Binaelan I**  
**Mosis Éhê Palas Uled**  
(Kebilang 21:4–9)

**21** **4**Na, egoh sa medoo tegeIslaél miglegkà dema diyà sa Getan Hol, mig-ukit da diyà sa dalan eg-angay diyà sa Dagat Akaba enù ka eg-iwoden da sa tanà Idom. Dodoo egoh da eg-ipanaw, neelut dé sa tali da **5**owoy sinelsel da dema Nemula i owoy si Mosis, guwaen da, “Maen di ya inuwit ko kami kedu Igipitu dò anì mematay ké diyà siini melabel tanà mediyù dalesan? Enù ka endà duen kaenen ké owoy endà ma duen sa inemen ké. Migtalawen ké dé

egkaen siini mana sa kaenen lagà endà dé duen nanam di.”

6Agulé pineangay i Datù Nemula diyà kenagda sa medoo uled mekehilu amuk memued. Huenan di, medoo sa tegeIslaél nematay danà da hinemued uled. 7Agulé mig-angay sa medoo etaw dema diyà si Mosis, owoy guwaen da, “Nesalà ké dé danà ké migsumbung si Datù Nemula owoy diyà keniko ma. Na, simbai ko diyà kenagdi anì kedanan di sa medoo uled.” Huenan di, igsimbà i Mosis sa medoo etaw. 8Agulé sinugù i Datù Nemula Mosis i anì baelan di sa galang éhê palas uled anì itagù di diyà sa kayu ighbugsud. Enù ka amuk uminengteng daa sa etaw hinemued uled diyà sa galang éhê palas uled, endà mematay di. 9Huenan di, binaelan i Mosis sa galang éhê palas uled owoy igttagù di diyà sa kayu ighbugsud. Sumalà dé sa etaw hinemued uled, amuk inengtengen di sa galang éhê palas uled, endà mematay di.

**Ini Sa Egoh I Nemula Mighemilì**

**Si Hosuwa Sa Nekesambì**

**Si Mosis**

(Kebilang 27:12–23)

**27** 12Agulé mig-ikagi Datù Nemula i diyà si Mosis, guwaen di, “Tekedeg ka diyà sa Tuduk Abalim anì sugpayalen ko sa uwang tanà ibegay ku diyà sa medoo

tegeIslaél. 13Amuk eghauwen ko iya wé tanà, mematay ka lagà mendaan sa kakay ko si Alon, 14enù ka endà migpangunut yu diyà sa igsugù ku keniyu dutu siedò melabel tanà Sin mediyù dalesan. Enù ka egoh sa medoo tegeIslaél migselsel diyà kenak dutu wayeg Méliba dò, endà igpehaa ko duu diyà kenagda sa kenemulawan ku.” Na, Méliba sa kepengadan da sa tebulan wayeg diyà Kades diyà sa melabel tanà Sin mediyù dalesan.

15Agulé migsimbà Mosis i, guwaen di, 16“O Datù Nemula, sa Nemula keduwan sa langun nehagtay, egegeni a diyà keniko anì gelalen ko sa maama mekegaga umuwit siini medoo etaw, 17owoy sa mekegaga ma mangulu amuk gumila da, anì endà mekeiling sa medoo etaw ko sa kebilibili melelu metelas amuk endà duen sa eg-ipat kenagda.”

18Agulé mig-ikagi Datù Nemula i diyà si Mosis, guwaen di, “Peumowi ko Hosuwa i anak i Nun sa mekegaga danà sa Suguy ku, agulé tenai ko sa belad ko diyà sa ulu di anì metandaan kagdi sa umuwit sa medoo tegelsaél. 19Petigdeg ko ma diyà sa taengan i Iliyasal sa tegesimbà owoy diyà sa taengan sa langun tegeIslaél, owoy tulon ko ma diyà kenagda si Hosuwa sa mekesambì keniko. 20Owoy

begayi ko ma kagdi sa duma egkegaga ko anì mangunut sa langun tegeIslaél diyà kenagdi.  
**21**Pegenien di sa ketabang i Iliyasal sa tegesimbà amuk igsaeen di diyà kenak sa mepion baelan da danà sa tandà hauwen di diyà sa ulim owoy tummin,<sup>d</sup> enù ka iya sa ukit i Iliyasal tumulù diyà si Hosuwa owoy sa langun tegeIslaél sa langun egbaelan da.”

**22**Agulé pinangunutan i Mosis sa igsugù i Datù Nemula diyà kenagdi. Pinetigdeg di Hosuwa i diyà sa taengan i Iliyasal sa tegesimbà owoy diyà sa taengan sa langun tegeIslaél.  
**23**Agulé igtenà di sa belad di diyà sa úlu i Hosuwa owoy igpetiig di ma kagdi sa mekesambì kenagdi, enù ka iya sa igsugù i Datù Nemula diyà kenagdi.

---

<sup>d</sup> **27:21** Ego anay eggamiten sa tegesimbà sa ulim owoy tummin anì metiigan da sa uyot i Nemula, dodox endà dé metiigan ta duu ini ego di sa ukit di.